

Feihyiz Guekgya Gaep:

Cietbuenzvuengz Yauzcuz

□ bouxhoiz: Ouh Caijfangh



第十四届中国瑶族盘王节开幕式
大型文艺晚会



▲ Beixnuengx Yauzcuz daenj buhvaq gyaundeidei camgya Cietbuenzvuengz.

◀ Ciengzmienh hung aen vanjvei yienjheiq Cietbuenzvuengz Yauzcuz.



▲ Bousai Yauzcuz youq Cietbuenzvuengz gwnzde boq gaeuvaiz gouz fuk.

Cietbuenzvuengz dwg ngoenzciet saxcaeq goengcoj Buentz Guj hung-naek ndeu, gyoengq vunz mboujlwnh ndaw guek rog guek cungj yawjnaek aen yizsi saxcaeq minzcuz neix dangqmaz. Ngoenzciet neix yienzlaiz dwg youz Huznanz Hwngzyangz Cangningz, Yungjcouh Gyanghvaz, Gyanghyungj, Gvangjsih Fuconh, Cunghsanh, Bazbu, Gunghcwngz, Ginhsiu, Gvangjdungh Lenzcouh, Lenznanz, Lenzsanh, Yujyenz, Swconh Nanzcungh, Gveicouh Gaijlij, Haijnanz Haijgouj, Yinznanz Sihsanghbanjnaz, Daizvanh Daizbwz, Hoznanz Cwngcouh daengj swngj gih yen(su) gyoengqvunz fuengzcug ranz Buentz iudaeuz gawjbanh, daengz seizneix gaengq bienqbaenz le daengz guek ngoenzciet saxcaeq Buentzvuengz ceiq hoengghwd. Moix bi liggaeuq cib nyied cibroek, boux camgya saxcaeq haenx mboujlwnh bouxsai mehmbwk vunzlaux lwgnyez, cungj daenj hwnj buhvaq gyaundeidei bonj minzcuz, comz youq itheij eu fwen, diuq foux, angq gvaq Cietbuenzvuengz.

2006 nienz 5 nyied 20 hau, youz Gvangjsih Bouxcuengh Swcigih Hocouh Si, Gvangjdungh Sauzgvanh Si bauq hwnjbae, aen Cietbuenzvuengz Yauzcuz ndaej Gozvuyen baecinj liedhaeu buek daih' it guekgya gaep feihvuzciz vwnzva yizcanj mingzloeg.

Gyoengqvunz Yauzcuz vihmaz aeu youq moix bi liggaeuq cib nyied ndawde saxcaeq Buentzvuengz nem eu fwen Buentzvuengz, diuq fouxgyong-raez ne? Cienznaeuz youq ciuhgonq gyaeraez, vunz Yauzcuz naengh ruz gvaq haij seiz, bungzdaengz rumz haengq langh hung, aen ruz youq gwnz haij biu le caet caet seiqcibgouj ngoenz cungj mbouj ndaej nem mboek, dayawj couh yaek deng ruz boek vunz dai lo. Mwhneix, miz vunz youq gyauej ruz gouz baiq goengcoj

Buentzvuengz bauj lwglan bingzonj, sim niemh ok maqmuengh hung. Guh niemh liux le, sikhaek rumz swnh langh dingz, aen ruz hix gig vaiq ndaej nem mboek, vunz Yauzcuz ndaej gouq lo. Ngoenzneix dwg liggaeuq cib nyied cibroek hau, ngamj dwg ngoenzseng Buentzvuengz. Yienghneix, vunz Yauzcuz ndaej hwnj mboek haenx, couh bae raemj faex guh rum, dawz haexnaengj daem baenz ceiz. Yienzhaeuh, caezgya eu fwen diuq foux, angqhoh gyoengqde ndaej sengmingh dauq nem angqhoh ngoenzseng Buentzvuengz. Daj neix hwnj, Yauzcuz couh dawz ngoenz neix dingh guh "Cietbuenzvuengz".

Vihliux hawj bouxsaenz daeuz angq, mwh saxcaeq Buentzvuengz, gyoengqvunz Yauzcuz cungj dawz 《Fwen Buentzvuengz》 aeu diuz fwen-sei geq youz Yauzcuz vunzlaiz cau, seiqdaih cienz roengzdaeu haenx ciengq, diuq youq naj Buentzvuengz. 《Fwen Buentzvuengz》riengz gij vueddoengh seiqseiq daihdaih saxcaeq Buentzvuengz (roxnaeuz heuhguh "boizyienh Buentzvuengz") okyienh caemhcaiq mboujduenh hwngfat.

1984 nienz 8 nyied, daengz guek gak dieg Yauzcuz daiyauj comz daeu Gvangjsih Namzningz, caezgya cungj doengzeiq dawz ngoenzciet caeq diuq Buentzvuengz nga Yauzcuz

"Menj" haenx guh giekdaej, caiq hwngfat baenz Cietbuenzvuengz, caezgya doxyaeng le dingh "Cietbuenzvuengz" guh ngoenzciet doengjit Yauzcuz, caemhcaiq dingh ngoenzciet neix youq liggaeuq cib nyied cibroek (ngoenzseng Buentzvuengz) gawjhengz.

1985 nienz liggaeuq cib nyied cibroek, daengz guek gak dieg Yauzcuz daiyauj caeuq canghsae ndaw biengz comz daeu Guengjsae Namzningz, yungh fuengsik hoihlienzyuen angq gvaq le ngoenzciet hoengghwd daengz minzcuz Cietbuenzvueng, neix youq gwnz lizsij Yauzcuz dwg baeznduj. Daengz seizneix, Cietbuenzvuengz Yauzcuz gaengq gawjbanh le 15 gaiq lo.



▲ Beixnuengx Yauzcuz youq ngoenz Cietbuenzvuengz eu fwen diuq foux.



▲《Fouxfaexsax Vayienh Yauzcuz》biujyienj ndeiyawj lai.



▲ Aen hoihlaex hung saxcaeq Buentzvuengz.



▲ Dahsau yauzcuz daenj buhvaq gyaundeidei camgya Cietbuenzvuengz.



▲ Aen hoihlaex hung saxcaeq Buentzvuengz yienhciegz vunz cien vunz fanh.



▲ Beixnuengx Yauzcuz angq diuq foux Yauzcuz.